

Ekwo-ozì Kẹ Mbù, Pọlu Deru Nù Ndu
Tesalonayika

¹ Ekwo-ozì-a shì l'ẹka mbẹdua, bụ Pọlu alaru Chìochì Tesalonayika, bụ ndu kẹ Chileke, bụ Nna; bya abụkwarupho ndu kẹ Nnajìuphu, bụ Jizọsu Kéreshì. Ndu mu ẹphe tukurù dee ya bụ Sulivanusu yẹ Timoti.

Gẹ Chileke meeru unu eze-iphe-oma; mekwaaphọ g'ẹhu dụ unu guu.

Umere ndu Tesalonayika waa ekwekwe phe

² Tekenteke, anyi epfu anụ Chileke, bụ Nna anyi bẹ anyi l'anyatajẹkwa unu. Anyi nọdu anọduje ekele Chileke ekele ẹhu unu g'unu ha. ³ Ọ tọ dụkpodaa teke anyi ta anyatajẹdu ozi unu gude ekweta jee; mẹ g'unu gude n-yemobu eseshiberu akanya ike; waa g'unu gude ọta-nshi nọdu Nnajìuphu anyi, bụ Jizọsu Kéreshì l'ẹka elshiberu ẹnya mbọku ono ike. ⁴ Unwunna anyi; anyi makwarụ-a lẹ Chileke yeru unu obu; bya ahọta unu g'unu bya abụru ndu nkiya. ⁵ Noo l'anyi byaru ezia unu ozi-oma ono; ọphu ọ bụdu-a opfu ọnu bẹ anyi gude zia ya unu kpurumu; Chileke gudekwa iya phọ goshi unu l'ike iya ereshi ire ike. Unme Chileke ono bẹ yekwarupho anyi ẹka; anyi dụ ike mee; unu maru ọkpobe amaru l'iphe anyi ezi bụ ọkpobe-opfu. Umere, anyi meru teke anyi l'unu shì tuko nọdukota mewarurọ unu maru ẹgube ndu anyi bụ. Ọ kwa g'ọo-duru unu lẹ ree meru g'o gude anyi mee ẹgube umere ono. ⁶ Tọbudu iya bụ; unu bya abụru ndu anwụ ẹka anyi. Ọ bụwaruro unu anwụ

ẹka Nnajiuphu. Ọphu unu eleduro ọ ẹ l'unu eje iphe-
 ẹhuka teke e ziru unu ozi-oma ono; unu gudelaa ẹhu-
 uto ọphu shi l'ẹka Unme-du-Nso nata ozi ono. ⁷ Ọo
 iphe ono meru g'o gude unu bya aburu ndu iphe, bukota
 ndu ọphu, kweru ọ ẹ Kéreshi ẹ Masedoniya waa l'alì
 Gurisu byaru awata anwu ẹka phẹ. ⁸ Ọ tọ bọdu-a
 l'ozi-oma ono, shi l'ẹka Nnajiuphu, bu ozi, unubẹdua
 l'ezi ono dzuru Masedoniya yẹ Gurisu kpurumu; obenu
 l'ekwekwe, unu kweru ọ ẹ Chileke bẹ ngakotaakwaru
 ẹkameka k'ọphu ọ tọ dudu onye anyi a-bya akoharu
 iya k'iche. ⁹ Iphe, bukpo ẹka anyi jeru bẹ anoduje
 epfugbaa ọ ẹ g'unu gude meshiberu anyi g'anyi byajeru
 ndu unu-a; mẹ g'unu gude sefukotawaa ẹka l'agwa ọbvu
 bya aghachiwaru Chileke iphu; wata ejeru ọkpobe Chileke
 ono, nọ ndzu ono ozi; ¹⁰ bya awatakwapho ele ẹnya Nwa
 iya ono, e-shi l'imigwe bya ono; mbu Nwa iya ono bu
 Jizosu, o meru o shi l'onwu teta nodu ndzu ono. Ọo ya bu
 onye l'a-dzo anyi l'oke-ẹhu-ẹghu ọ ẹ Chileke, ọ-tukoshi
 ndu eme iphe-ẹji.

2

Ozi, Pọlu jeru ẹ Tesalonayika

¹ Su-a; unubẹdua l'onwunu; unwunna anyi; maru
 l'akpafuta, anyi kpapfutaru unu ta abudu anyi ọ ẹ
 mmanu. ² E -gudekpọoru l'anyi jewaru iphe-ẹhuka
 ẹ Filipayi mẹ iphe-iphere, e meru anyi; ọle Chileke
 melekwaru-a obu shihu anyi ike; k'ọphu anyi byaru ezia
 unu ozi-oma ọ ẹ Chileke ono. Ọphu anyi ejedururo epfu
 ọ ẹle aakpobyi iphe, anyi eme akpobyi. ³ Mbu-a; teke
 ono, anyi l'arwo unu g'unu bya aburu ndu ọ ẹ Kéreshi
 ono bẹ ọ tọ bukwa g'anyi bya edephua unu edephu;
 ọphu ọ dukwa ẹjo-iphe, du anyi l'okpoma; ọphu anyi
 abyakwaru g'anyi haru unu ghota l'ugho. ⁴ Ọ chikwa

g'ò dū Chileke l'uche g'anyi pfua bẹ anyi epfuje. Noo lẹ yẹbedua bẹ lewaru anyi ẹnya maru l'anyi goshiwaru l'ò gbaru kẹ gẹ ya gude ire anyi ẹka; o woru ozi-oma ono ye anyi l'ẹka. Anyi te epfukwa g'ò tsòje nemadzū ụtso lẹ nchị; gbahaa g'anyi pfuje iya g'òo-dū Chileke ree; mbū onye ono, l'eletajẹ ime obu anyi; maru iphe, anyi l'arị ono. ⁵ Unu maru-a l'onwunu l'ò tọ dūkpodaa teke anyi gude ire mecha mecha pfuru yeru unu. Ọphu anyi emeduru umere g'ò bụ l'òo iphe, anyi abụdu bẹ anyi sūru l'anyi bụ; g'eeshi g'anyi erita iphe l'ẹka unu. Ọ kwa Chileke bụ onye a-harū anyi enge iphe, anyi epfua. ⁶ Anyi te emekwaru gẹ ndiphe; ọzoo g'unubedua; ọzoo gẹ ndu ọzo jaa anyi ajaja. A makwarū-a l'eshinu anyi bụ ndu-ishi-ozì Kéreshi bẹ ọ gbaru g'unu vuru mkpa-ẹhu anyi; ⁷ obenu l'anyi dūru unu odoo gẹ nwanyị adujeru ụnwegirima iya-a. ⁸ Anyi yeru unu obu shii; k'ọphu ọ tọ bụdu-a ozi-oma kẹ Chileke ono kpurumu bẹ anyi l'unu gba mgba; anyi gbakwaphọ ndzū anyi mgba; kẹle unu dūnukaru anyi l'obu.

⁹ Mbū-a; ụnwunna anyi; unu nyatajẹkwa ẹgube akanya, anyi seru; l'anyi jekwaru ozi kuta ẹphuru phee. Teke ono anyi l'ezi unu ozi-oma ono, shi Chileke l'ẹka ono bẹ anyi jeru ozi l'eswe jee ya l'ẹnyashi gude ejeta nri, anyi e-ri; g'ò tọ dū onye anyi a-būru ivu-erwa swiru. ¹⁰ Unu a-nọdu agbakpọadaru anyi ọdzori. Nokwaphọ gẹ Chileke a-nọdukwapho agbaru iya anyi. Umere, anyi shi emejeru unubẹ ndu kwetarū ozi-oma ono gekwaru egeru bya abūru umere, pfuru nhamūnha. Ọ tọ dūkpodaa ẹka anyi metaru iphe, aata anyi ụta. ¹¹ Unu maru l'òo gẹ nna anọduje ehe ụnwu iya-a bụ g'anyi shi gude ehe unu l'ẹhu l'ẹhu. Anyi dūru unu obu; bya emee g'obu shihu unu ike; anyi pfushiaru iya unu ike; ¹² sū g'unu meje iphe, dū Chileke ree; mbū onye ono, kuru unu g'unu bata l'ẹka ya

bū eze; waa l'òdu-biribiri iya ono.

¹³ Iphe, meru g'o gude òphu anyi atuwojedu eka ekele Chileke ekele me anyi -nòdu epfu anū iya bū; lẹ teke unu nūmaru opfu Chileke ono, anyi byaru ezia unu ono bẹ unu ta anataḍuru iya gẹ opfu nemadzū; obenu l'unu natarū iya gẹ Opfu Chileke; ọ bụkwarua Opfu Chileke bẹ ọ bū eviya. Noo kẹle ọo Chileke ono bẹ l'ere ire l'ime unubẹ ndu natarū ozi-oma ono. ¹⁴ Ụnwunna anyi; ọo iphe ono, nwuru unu ono bū iphe, shi nwuaru Chiochi kẹ Chileke, bū ndu ephe lẹ Kéreshi tugbaru būru nanū l'alị Jiudiya. Ọo 'epho gẹ ndu alị unu eme unu mkpawere bū gẹ ndu alị ephebe ndu Jiu shi eme phẹ iya. ¹⁵ Ọo ndu Jiu ono bẹ bū ndu ono, gburu Nnajiuphu, bū Jizosu; gbua ndu mpfuchiru Chileke; chia anyịbedua chifu l'alị phẹ. Ephe gude egube ono meta iphe, ta adudu Chileke ree swibe onwophe. Ephe būru ọgu duru onyemonye. ¹⁶ Ephe kposhiru anyi ezi ndu abudu ndu Jiu ozi-oma, l'adzọ phẹ nū ono. Ọ tọ dukpoda teke ephe te emetajedu iphe-ẹji jasū l'oobe phẹ l'ekpiri. Ọle oke-ẹhu-eghu kẹ Chileke bẹ mechakwanaanū dapfuta phẹ.

Ọogu Pọlu ẹgu akpapfu ndu Tesalonayika

¹⁷ A bya abya l'ẹhu k'anyi; ụnwunna anyi; anyi nọakwaru nwòdu òphu anyi l'unu ahụmaduru; ọle obu anyi nọkwa-a l'eka unu nọ. Oghoroko unu duta-beru anyi; k'òphu bū l'anyi shiwaa ụzenya seta g'eeshi g'anyi l'unu hụmakpoo ọzo. ¹⁸ Anyi shi eme g'anyi eme kpapfuta unu; mbẹdua, bū Pọlu l'ishi onwomu tukpoakwaru onyo abyabya ugbo olemole; òphu Nsetanu ekwedu g'anyi bya. ¹⁹ G'òoduhabe; ?Ọ duru òphu abụedu unu kpurumu bẹ bū ndu anyi chiru upfu yeru bya aburu unu l'e-me g'ẹhu tsoo anyi uto; bya aburu unu bẹ l'a-buru obunggo, anyi e-gudeje eku onwanyi l'ataphu Nnajiuphu anyi, bū

Jizos̄u Kéreshi m̄e ̄o -byal̄ep̄ho ̄ozo. ²⁰ Mb̄u-a; ̄o kwa unub̄edua b̄u ip̄he, ee-gude jaa anyi ajaja bya ab̄uru unu b̄u ̄ehu-ut̄so anyi.

3

¹ No iya; a n̄onyakpoo; oghoroko unu ono d̄uta-be anyi; k'̄ophu anyi ad̄uedu ike tagbua ya l̄e nshi; anyi ch̄ia idz̄u s̄u l'anyi a-n̄oduwanu l̄e At̄ensu nk̄inyi anyi. ² Anyi zia Timoti, b̄u nwune anyi nwoke; bya ab̄uru onye-oz̄i k̄e Chileke; b̄uru onye anyi l'iya t̄ukoru ese akanya k'ezi ozi-oma k̄e Kéreshi ono; g'̄o bya emee g'unu kabaa ap̄f̄ushi ike; l'o mekwaph̄o g'obu kabaa unu eshihu ike l'ip̄he, unu kweru. ³ G'̄o t̄o d̄u g'unu ha onye e-gude k'̄ehu-a, aakpa unu-a kp̄olaahaa az̄u; eshinu unub̄edua l'onwunu maru l'iphemip̄he ono b̄u ip̄he, nw̄ufutajenu l'̄ehu anyi. ⁴ L̄e-a; anyi gbuakwaru iya unu tororo; teke ono, anyi n̄o l'ibe unu ono s̄u unu l'ee-mekwa anyi ewere. Nta-a b̄e unu eleanaa l'̄o nw̄uwaru ̄egube ono ̄obu; ̄o b̄uru ip̄he, unu t̄ukoru mak̄otar̄u. ⁵ Noo g'o gude mu n̄onyaa; ̄ophu mu ad̄uedu ike tak̄ota nshi; mu zia g'a bya amaru g'unu p̄f̄u-shiberu ike l'ekwekwe, unu kweru k̄e Chileke. L̄e mu ts̄uhukwaru ebvu s̄u ?a maru nwandale ono ta ah̄uadaaru n̄u unu ama; akanya ono, anyi seru l'̄ehu unu ono b̄uru akanya ̄ola-l'iswi.

⁶ ̄Ole nta-a b̄e Timoti shiwa a l'̄eka unu n̄o lwawaa lwapfuta anyi bya ezia anyi ozi, d̄u ree s̄u l'unu kweshiru-a ike; bya enweru n-yemobu; t̄eme unu n̄odu an̄oduje anyata anyi ̄okpobe anyata tekenteke. L'̄oo g'oghoroko unu ad̄uje anyi b̄ukwapho g'oghoroko anyi d̄u unu. ⁷ ̄Unwunna anyi; ̄o kwa l'unu p̄f̄uru p̄f̄ushia ike l'ekwekwe, unu kweru k̄e Chileke meru g'o gude obu n̄odu eshihuje anyi ike l'ip̄he, b̄ukpoo ip̄he-̄huka, anyi eje; m̄ekpoo ewere, eemek̄ota anyi. ⁸ K̄ele ̄o nta-a

bẹ ndzụ bụ anyi Ọkpobe ndzụ; eshi ọp̄hu unu p̄furu p̄fushia ike l'atụgba, unu lẹ Nnajiuphu t̄ugbaru. ⁹ Sụ-a; ?d̄enukpoo g'anyi a-wata awata ekele Chileke ekele ẹhu unu; m̄ẹ k'ẹhu-utso ono, o meru Ọ n̄odu ats̄o anyi l'ip̄hu ȳebe Chileke op̄fu ẹhu unu ono? ¹⁰ Eswe l'enyashi bẹ anyi egudeje obu anyi g'ọ ha ep̄fu an̄u Chileke ep̄fushi iya ike s̄u g'o mee g'ip̄hu anyi l'unu kp̄ogba; g'anyi e-mekwanaa; ẹka unu teke ekweshidu ike g'unu kweshia ike.

¹¹ Nta-a bụ ḡẹ Chileke anyi, bụ Nna anyi l'onwiya; m̄ẹ Nnajiuphu anyi, bụ Jiz̄osu K̄éreshi t̄ọru anyi ụzo, anyi e-shi abya unu agbap̄he. ¹² T̄eme ḡẹ Nnajiuphu mekwaaph̄o g'unu kabaa eye nwibe unu obu; mb̄u g'unu kwata ye ph̄ẹ iya yeshia ph̄ẹ iya ike; ye ph̄ẹ iya k'anȳinyi. Nokwaph̄o g'unu e-ye iya nemadz̄u mgburugburu. Ono b̄ukwarup̄ho g'anyi yeru unu. ¹³ Ọo ya b̄u; g'oo-mee g'obu shihu unu ike; unu a-p̄furu l'ip̄hu Chileke, bụ Nna anyi b̄uru ndu d̄ubebe ree. Ọ t̄o d̄udu ẹka ụta ad̄uru unu teke ono, Nnajiuphu anyi, bụ Jiz̄osu K̄éreshi ȳẹ ndu nkiya a-sw̄iru b̄ya ono.

4

Umere, d̄u Chileke ree

¹ Ụnwunna anyi; ip̄he ọzo, anyi n̄o l'ẹka Nnajiuphu anyi b̄u Jiz̄osu ep̄furu unu ep̄fushiru iya unu ike b̄u l'ip̄he, unu nw̄utaru l'ẹka anyi b̄ukwa g'unu l'e-shi gude ndz̄u unu eme ip̄he, d̄u Chileke ree emeshi iya ike. Ọ b̄urup̄ho ip̄he ono b̄ẹ unu emēp̄ho. Nta-a b̄ukwa g'unu kabaa ya emeshi ike. ² Noo l'unu mawaru-a l'anyi shi l'ẹka Nnajiuphu, b̄u Jiz̄osu t̄aru unu ekemu. ³ Sụ-a; ip̄he, d̄u Chileke ree g'unu meje iya b̄u; g'unu dobe onwunu ns̄o l'ẹka Chileke; mb̄u g'unu ta an̄odukwa apharw̄ushi onwunu ililekp̄o. ⁴ Mb̄u-a; g'onyen̄onu l̄ẹ g'unu ha

majekwaru g'ooshi eme ehu iya g'o du nsɔ; buru iphe, aakwabe ubvu. ⁵ Unu te egudejekwa aphu kparikpari iya dalahu iya je alua ge ndu abudu ndu Jiu, bu ndu amadu Chileke. ⁶ Oo ya bu g'o to du onye e-meswe nwibe iya; ophu o dukwa onye e-mekputa nwibe iya. Mbua-a; anyi pfuhaakwaru iya tsua ya unu atsutsu le nchi; su l'onye eme egube iphe ono be Nnajiuphu a-gwakwa ochi. ⁷ Noo le Chileke ta abukwa g'anyi bya emerwushije onwanyi be o kuru anyi oku iya; o kwa g'anyi du nsɔ. ⁸ Oo ya bu; l'onye jikaru iphe ono, anyi ezi ono ta abukwa nemadzu be o jikaru. O kwa Chileke b'o jikaru; mbu Chileke ono, anuje Unme-du-Nsɔ iya ono.

⁹ A bya abya le k'eye unwunna unu obu; ono ta abuhekwa iphe, aa-bya awataru unu ederu l'ekwo. Noo kele unubedua l'onwunu be Chileke l'onwiya ziwaru eye nwibe unu obu. ¹⁰ Mbu unu nodu emeekwapho g'o ziru iya unu; bya eyee unwunna anyi, nokota le Masedoniya mgburugburu obu egube ono. O le iphe, anyi epfushiru unu ike; unwunna bu; g'unu kabakporo eme egube ono kwaseru. ¹¹ Unu kukebeje ehu g'unu nodujeepho le nchi odoo; leta enya l'eje ozi ehu unu; gude eka unu setaje iphe, unu e-gude buru, buhukwaa iphe, anyi pfuhawaru unu-a. ¹² Noo iphe unu a-noduje eme: o buru iya bu umere, gbaru unu l'eka ndu ta abudu ndu ke Kereshi no; k'ophu ephe a-kwabeje unu ubvu; o to dukwanu onye unu a-su l'oo ya teme unu emee mkpa, duru unu.

Abyabya Nnajiuphu

¹³ Unwunna anyi; iphe, anyi eme g'o doo unu enya bu ke ndu nwuhuru anwuhu; g'oo-too rwujekwanu unu l'ehu shii g'oorwuje ndu te eledu enya kele ephe le Kereshi emecha nodukota. ¹⁴ Anyi kwetawaru kweshia ike le Jizosu nwuhuchaaru bya eteta nodu ndzu. Nokwapho

g'anyi kwekwaruḗpho lẹ Chileke e-shi Jizḗsu l'ẹka tuko ndu woadaru onwophẹ ye Jizḗsu l'ẹka tẹme ẹphe nwuhu mee g'ẹphe lẹ Jizḗsu tuko teta nḗdu ndzụ; mee ẹphe etsoru iya bya.

¹⁵ Sụ-a; iphe-a, anyi epfuru unu-a bẹ bukwa ozi, shi Nnajiuphu l'ḗnu; l'anyiḗbe ndu ọphu a-nḗdukwadia ndzụ teke ono, Nnajiuphu a-bya ọzo ono; bẹ tee vukwaru ndu ọphu nwuhuhawaru nḗ phḗ ụzo. ¹⁶ Noo lẹ Nnajiuphu l'onwiya bẹ e-shi l'imigwe alwazeta l'alị; gude olu eze onye-ishi ojozi-imigwe echi mkpu; egbukwaphḗ opu Chileke. Tḗbudu iya bḗ; ndu ono kwetaadaru kẹ Kéreshi tẹme ẹphe nwuhu ono evuru ụzo teta nḗdukota ndzụ. ¹⁷ Chileke ezichata anyiḗbe ndu ọphu nḗkwadu ndzụ teke ono; anyi l'ẹphe atuko nḗdu l'ime urwukpu jeshia Nnajiuphu, bḗ Jizḗsu ndzuta l'ephekerephe k'ọphu bḗ; ẹka Nnajiuphu nḗkpoephḗ; anyi anḗdu. ¹⁸ Ọo ya bḗ; unu gudeje opfu-a dḗa nwibe unu obu.

5

Anwuru ẹnya kwabẹru abyabya Nnajiuphu

¹ Sụ-a; unwunna anyi; ọ tḗ buhekwaro iphe, aa-bya awata ederu unu l'ẹkwo sḗ unu l'ḗ waa ẹgube teke ọ bḗ; ọzo l'ḗ waa mbḗku, iphemiphe ono e-me. ² Kẹle unubḗdua l'onwunu maru ọkpobe amaru lẹ mbḗku, Nnajiuphu a-bya bẹ a-tḗ l'upfu g'iphuru, byaru oshi l'enyashi. ³ Kẹle ọo teke ndiphe sḗru: “Ha! Mgboko dukwaa jii nta; ọo akwa g'onyenḗnu jeje ẹka dḗ iya ree.” Noo teke bḗ; a -bya amaru ọla-l'iswi atḗ phẹ l'uzorehu g'ezeda atḗje nwanyị, dḗ ime-a; woru phẹ yifu; ọ tḗ dḗdu mẹ onye lanḗ anahḗ nḗ. ⁴ Obenu-a; unwunna anyi; unubḗdua ta anḗkwa l'ḗchii kẹ gẹ mbḗku ono tḗ unu l'uzorehu g'abyabya onye-oshi. ⁵ Noo kẹle g'unu ha bẹ bu ndu bu l'iphóró mẹ l'ẹka bḗ eswe. Anyi ta

abukwa ndu bu l'eka bu enyashi; ophu anyi abukwa ndu bu l'ochii. ⁶ Oo ya bu; l'eshinu o du egube ono; g'anyi te kukwaru mgbenya ge ndu ophuu ekugbaa. O chia g'anyi nwuru enya; g'enya doo anyi risaa. ⁷ Mbū-a; ndu eku mgbenya bukwa l'enyashi be ephe ekuje iya. O buru l'enyashi be ndu angutaje mee akpo kulakula anguje iya akpo iya. ⁸ Obenu l'eshinu anyibedua bu l'eka bu eswe; g'enya donaa anyi risaa. G'ekwekwe, anyi kweru ke Chileke yee eye obu, anyi yeru ibe anyi buru uwe-igwe, anyi e-yeje; mbu uwe-igwe, l'egbobutaje anyi okpoma. G'adzota ono, anyi ele enya iya ono buru okpu-igwe, anyi e-kpuru. ⁹ Chileke ta atukwaru anyi eka g'anyi buru ndu ya a-tukoshi oke-ehu-eghu iya. O chikwa g'anyi buru ndu ya e-shi Nnajiuphu anyi, bu Jizosu Kereshi l'eka dzota. ¹⁰ Mbū Jizosu ono, nwuhu-chiru anyi ono; g'oo-buru e-mechaa; anyi l'iya atuko dzuru ndzu teke oo-bya; me anyi -no ndzu; me anyi -nwuhuru anwuhu. ¹¹ Noo g'o gude anyi su unu-a; unu meje g'obu shihu nwibe unu ike. Unu eyejekwarupho nwibe unu eka g'ephe pfushia ike l'iphe, ephe kweru, bunaa iphe, unu emena-a.

Iphe, unu e-meje

¹² Unwunna anyi; o kwa arworwo be anyi arwo unu su g'unu kwataje kwabe iphe, bu ndu ono, l'ese akanya ehuru unu ono ubvu, bu phe bu ndu ono, Nnajiuphu hotaru g'ephe buru ishi unu; bukwarupho ndu a-nodu akpo-ziru unu uzo. ¹³ Unu egudekwapho k'ozu ono, ephe ejeru unu ono eyeru phe eso; yekwaa phe pho obu okpobe eyeye. Unu l'ibe unu eburu le nchi odo.

¹⁴ Oo arworwo be anyi arwokwapho unu unwunna; su g'unu lojeru ndu enyiru-ozu eka le nchi. Ndu ophu obu ebvuduru ebvuru be unu e-meje g'obu shihu ike. Ndu ekweshiduru ike be unu eyejeru eka g'ephe kweshia ike.

Unu atajeru onyemonye nshi. ¹⁵ Unu letaje ɛnya g'ɔ tɔ du g'unu ha onye e-gudeje ɛjo-iphe melata nemadzu iphe-ɛji, o meru iya. Gbahaa iphe, unu a-nɔdujeeppo achi nta iya bu g'unu e-shi mejeru nwibe unu ree; mekwaaru iya phɔ onyemonye ɔzo.

¹⁶ G'ɛhu tsɔjekpoepo unu utso tekenteke. ¹⁷ Unu ta atuwojekwa ɛka l'epfu anu Chileke mkpɔrumkpuru. ¹⁸ Unu keje Chileke ekele iphemiphe, anwuru unu g'iphe aduhabe. Noo iphe, Chileke achɔ unu l'ɛka bu ono; unubɛdua, unu lɛ Kɛreshi tugbaru buru nanu-a.

¹⁹ Unu ta agbanyijekwa iphe, Unme-du-Nsɔ eme. ²⁰ Ophu unu anmajekwa mpfuchiru phulaphula. ²¹ Olee; unu hujekwa iphemiphe ama; hota ophu du ree; gudepyabeshia ya ɛka ike. ²² Unu esefukota ɛka l'iphemiphe, bu ɛjo-iphe g'ɔ duhabe.

Opfu mkpɔchi-ishi

²³ Anyi su-a; gɛ Chileke, bu iya emeje g'anyi buru l'ɛhu-guu mee unu g'unu buru ndu nkiya ɔkpobe aburu. G'o dobe ndzu unu l'ophu; mbu uche unu me obu unu me ɛhu unu; l'o dobe iya nno g'ɔ tɔ du ɛka uta a-du iya teke Nnajiuphu anyi, bu Jizosu Kɛreshi a-bya ɔzo. ²⁴ Iphe ono be bu iphe, oo-mekota g'ɔ ha; noo kele ɔo ya kuru unu; teme ɔ buru onye apfushije ike l'iphe, o pfuru.

²⁵ Unwunna anyi; unu pfujekwa nu Chileke l'opfu ɛhu anyibedua.

²⁶ Unu kelekwa iphe, bu unwunna anyi g'ɛphe ha ekele nmata phe aka, du nsɔ.

²⁷ Iphe, mu eme gɛ mu pfuaru unu bu; unu gukwaa ɛkwo-ozia g'o rwudzuru unwunna l'ophu lɛ nchi. Nnajiuphu anukwaa iphe-a, mu epfu-a.

²⁸ Gɛ Nnajiuphu, bu Jizosu Kɛreshi meeru unu eze-iphe-oma g'unu ha. Nokwa g'ɔ du.

Bayıburu Izii
Izii: Bayıburu Izii Bible

copyright © 2014 Wycliffe Bible Translators, Inc.

Language: (Izii)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 30 Dec 2021 from source files dated 30 Dec 2021

c6885c7c-c550-5b8b-a4fe-4bd714af4f6d